

杏
花
邨
志

杏花邨志卷之六

邨人

題詠

古詩

五言

梅堯臣

聖俞宣城人景佑間知建德縣

西禪院竹

卽今乾明寺

古寺帶修岡青蔥萬竿玉春梢長舊林夏雨濕新綠幽禽
嘯呼襍晚照陰晴續解帶欲忘歸壺觴歡自足

李

廌

方叔華州人有傳

文選閣

申轅應楚聘鄒枚適梁苑藩侯嘉賓客賢賢易鷹犬黃綺
游漢廷羽翼繪繒繳遠泰府十八公攀附名益顯昭明衆才
子文囿俾蒐選高齋切浮雲雉堞俯晴巘尚應愧兩閒筆
削非大典

黃庭堅

魯直分寧人紹聖元年過池陽

貴池

白注池人祀昭明爲鄣西九郎
特新覆大舟人以爲神之威也

橫雲初抹漆爛熳南紀黑不見九華峰如與親友隔憶當
秋景明九老對几席何曾閉蓬窗卧聽寒雨滴不食貴池

魚喜尋昭明宅筆硯鼠行塵芝茵生銅鬲思成佳句夢遺
我錦數尺屬者浪吞舟風雹更附益老翁哭婦兒相將難
再得存亡如日月薄蝕行道失流俗暗本原謂神吐其食
神理尚有私丘禱久矣默

按詩及詩題自注以游昭明廟作而紀事也故錄之

李得春 首川貴池人祀鄉賢 以後俱明人

劉觀明前輩招飲杏花邨

居平無玩好而素樂山溪爲赴師門約追隨郎以西氣候
正明澈和風飄我袿非如前日雨舉足戒塗泥步趨依杖

履旋折任天倪大要年老後間緩以相攜亭廠開卹曲紅
樹傍檐擠林埜曠人意湖平艸色齊顧瞻存靜理豈復遠
攀躋傳觴無吳敖微言古與稽小杜風流在神情想未睽

劉

城

伯宗貴池人崇禎乙亥保舉授知州未仕歸隱
峽川莆田余懷有私謚文節議祀鄉賢

寒食出西郊取徑昭明廟歷乾明寺歸

今年春色早信步得芳菲尋幽意所便時與侶伴違青苔
在山曲鐘磬相因依螭碑跌燕麥蚪篆蝕苔衣當時選文
者臺空人未歸懷古意不盡逐景暝光微返叩法王像豁
我塵情非

周

蔚

雪顙皖江人賦詩千首藏于家並有白壽白祭文此山林達士也

杏花邨懷顧韻叅使君

古人不可見我來長嘆嗟文采與風流春風吹落花五馬去不留黃壚委泥沙只有遠山画相看未有涯

方文

俞山桐城人壬子生以與靖節少陵香山同好事者作四壬子圖画按何堪集有靖節生年辭

西廟留題

昭明梁太子嗜學稱文人如何千載後赫赫爲神明相傳至秋浦食魚美而珍遂以貴名池惠愛及斯民斯民感其義立廟湖之濱廟貌甚弘敞四山多松筠水旱必祈禱其

餘亦咨詢里社號土主祭祀永不湮我夙慕遐軌今始出
城闐取道乾明寺曲澗通江津所愧羈旅中蘊藻難具陳
仰首若舊識臭味遙相親當年注文選佐佑有六臣胡不
列其旁配享垂千春

甯

尚

山同臨城人乙酉以後不復儒冠自裂皂布爲
昌峒死東汝楊森作布昌山人傳

杏花邨訪友畱宿得瓜字

少時同老友到此看春花埜店沽清酒弔古論無涯抵今
三十載重游不勝嗟教塲餘戰壘坡上無人家隔林有仲
蔚幽栖蔽蓬麻扣戶一相訪風物絕紛譁弟兄稱孝友意

氣殊豪華把臂解冠佩留連坐啜茶談劇迥忘返驚顧日
將斜慙慙具菜飯新酒薦秋瓜

陳元鍾

孝受福建連江人生鄭所南之鄉高尚著書猶有遺風

九日杏花邨吟

獨坐不得意出門隨所遇言至杏花邨不見杏花樹千年
事已非風日愜幽趣川原曠烟水草木秋山暮忽憶淵明
詩兼諷牧之句杏花與菊花寂艷豈同路陶杜不可作感
時因並慕

田

庶

叔段北直大興人官池別駕器識人才爲多及歸休合郡立去思碑于東門外

郎子趙客家杏花邨博雅有逸興因樊川詩輯杏花
邨志蓋猶愈於古之志如藍者賦此以正

至止西郊畔茂林松栢多云是杏花邨春色盈烟莎卉木
植則發所虞在斧柯悠悠杜子咏行人猶載過瞻言春登
臺飲醇當嘯歌苞萼絕長條惠風如之何

宗元豫 子發廣陵人

九日集西郊拜石堂

令節喜晴明寒山展游眺遂造幽人廬清言雜吟嘯繼繼
不能忘林端來反照

胡其毅

致果一名澈字靜夫江寧人中翰曰從先生子

題杏花邨寄郎趙客

昔聞楚漁父懼入桃花源靈境不再遘
大地歸囂喧孰知秋浦側留此古杏邨
樊川偶遺詠春雨還郊原草色作寒食
林光搖旅魂牧兒自三五簑笠牛背蹲
酒家隔前隴掩映青帘翻至今號樂國
淳朴風猶存中有高士宅絃歌風所敦
太守繼攬勝朱轡曾到門不羨曲江宴
惟設老瓦盆何時艤舟過問道傾芳尊

吳非

步出城西門

一日西門行古詞惟飲醇酒炙肥牛作樂府

步出城西門胡爲逃宴會禮法如受拘我豈欲自外醉飽
取醇肥古歌別有味任情四山間遠嵐枯亦翠幾家居就
荒牆壁蘆補敗壇墠填丹門棹楔新塗字粉飾規前人遺
風復何在空有杏花邨遙指酒焉賞苔蘚埜殿班額尚乾
明寺不知光孝名何年遂失記鍊佛像巍然高約二丈計
范合如衲衣木田片相砌幹緣從紹興訖功以辛未要其
施財人姓氏兼外內或稱武翼郎都統亦官制或稱淮陽
軍寧武亦地誌彷彿猶可稽饌餉莫辨識當時棹桡頽咸

淳更修備相傳火烈焚金身獨不壞歷年四百餘萬歷鑄
全配我感此像存古礎餘一二箇可役蛟龍徒思絕響吹
西峰聖者留銘詞誰手製至今皆無遺事遠惟嘆僧頑
雖拒人寧與求所自

王 著

定州浙江補水人

題杏花邨

金陵杏花邨居人亦不知游客問遺蹟老樹無子遺池陽
有古邨春花無繁枝地以邨爲名風景堪追思詩傳唐刺
史曰誰杜牧之今有賢主人風雅相總持據遺編邨誌選

勝徵新詩引人入深致如見花開時

錢之選

文青九華人

游杏花邨兼呈友人

走傍石城西經過石橋路楊柳隔溪垂人家連屋住半里
入花邨寒燭寡荒圃細想全盛時夾道栽杏樹酒旗插當
壚騷客頻來顧不見杜使君時節驚風雨弔古倍生情遊
游得真趣只今花枝殘好景不多遇回角起譙聲平湖飛
白鷺遺跡未全荒谿山自環互幽人擬結廬良辰思快聚
尋花載酒來得意狂題句

范

鑄

歐冶號躍齋會稽人州丞所著有燭谿刺言吳門尤侗鍾山紀映鍾序之行世

秋日過杏花邨

夙昔嗜丘壑耻爲都市游
風塵淄鷁冠面目懷驛羞
秋浦秋色佳客轍爲勾留
出郭過杏邨風景何悠悠
酒帘搖故壚錦樹疊丹丘
湖光雙匹練山色四遭周
只此名勝地無花亦解憂
疎楓絳霜葉疑與杏相侔
行行欲問酒沉醉凌滄洲
逝將棄霧濁上與古人謀
杜牧偶經過風流傳不休
人物重山川勝情自可求
千古賁茲邨地境還清幽

錢

塈

价臣長洲人學博

杏花邨

朝出秀山門晴雲映深鵑橋下水潺湲菜花香滿路不見
杏過墻空吟牧之句石徑接荒原酒家在何處廢井轆轤
閒半畝濃陰聚傳是黃公壚多恐游人誤山空少牧童殘
僧聊共語昔有武昌師旌旗蔽埜住芟刈盡園林花枝何
足數寒食與東風春愁亦誰護邨中好事稀鳥聲自朝暮
客聞起太息彈指古今度時清郊甸寧事與賞心遇此爲
觴咏鄉高賢曾屢過況是士元家風流饒餘趣何當二月
時遍種千枝樹

余有成 玉生更名思復將樂人高士

留別陳會山兼懷杏花邨

昔聞秋浦佳茫昧不識路今作秋浦游知音忽相遇若翁
古遺直恬淡心迹素蒿目對蒼生豈論逢時具行邁觸霜
風高嚴見清暑多君能古處尊酒歡相聚李白千古詩
篇寫真趣風流各一時今古遙欣慕惆悵杏花邨沈吟烟
柳樹佳會自有期無爲歎遲暮

宗揆藻 林宗揚州人

杏花邨同包一水諸子小集

飲中有真樂但問何所宜胸懷遇曠達天地自清思風聲
寒廢葉日色冷空枝蕭蕭古寺影相對遠山持登高始縱
目心領神已移况得一邨外江光千里奇樊川舊遊處還
堪沽酒卮烹魚謀田舍携尊多素知傳觴失行次不勸亦
不辭一飲無不醉誰知歸已遲更愛平橋上新月如蛾睂

吳

襄

七雲九華人

湖山

兀坐湖山巔醉向湖山語當年沽酒人杯杓今何所芳艸
城一彎落花鐘數杵山水悄無言日盪江中嶼

范鑄

歐治號羅齋會稽人州丞所著有燭谿剝言吳門尤侗鍾山紀映鍾序之行世

秋日過杏花邨

風昔嗜丘壑耻爲都市游
風塵淄鵲冠而目懷驛羞秋浦
秋色佳客轍爲勾畱出郭過杏花邨風景何悠悠
酒帘搖故墟錦樹疊片丘湖光雙匹練山色四遭周
只此名勝地無花亦解憂疎楓終霜葉疑與杏相伴
行行欲問酒沉醺淩滄洲逝將棄霧濁上與古人謀
杜牧偶經過風流傳不休人物重山川勝情自可求
千古賁茲邨地境還清幽

錢參

介臣長洲人學博

杏花邨

朝出秀山門晴雲映深陽橋下水潺湲菜花香滿路不見
杏過墻空吟牧之句石徑接荒原酒家在何處廢井轆轤
閒半畝濃陰聚傳是黃公塢多恐游人誤山空少牧童殘
僧聊共語昔有武昌師旌旗蔽埜住芟刈盡園林花枝何
足數寒食與東風春愁亦誰護邨中好事稀鳥聲自朝暮
客聞起太息彈指古今度時清郊甸寧事與賞心遇此爲
觴咏鄉高賢曾屢過况是士元家風流饒餘趣何當二月
時遍種千枝樹

秋日集杏花邨登益頂山以僧舍題額清涼別境四字

分韻限五言古

益音鉢

吳非

得清字

重九維三日佳氣風以清
吾宗招出部登高同勝情
江流遙界白湖舫將通黃
九華插天外六峰浮嵐光
談言欣俯酒斟酌醉何狂
如忘歸路徑夕陽催欲暝

吳德奎

得涼字

西郊爽氣涼排空雁陣長
千林欲改色艷擬杏花芳
隨意尋幽徑攜樽過寒塘
懷古多憑吊披襟興激昂
高譚驚四

座雅韻雜松篁躊躇行且止微風送殘陽

吳德昭

得別字

性癖愛尋山况值秋光潔獨步亦成歡何幸同賢哲共躋
盜頂山螺染千峰列地盡長江環樹高橫雲截風景當不
殊阮嵇情自別何以舒曠懷杯中餘絕藥

郎

遂

得境字

秋浦長似秋此語意以永湖光况秋清四山開幽境好友
欣相從挈榼步移影指顧爲扶筇躋攀登絕頂游情載詠
歌楓林紅似杏

古詩 七言

楊振 宋人

乾明寺前古松

北山斷處唐朝寺路隨山轉江城裏獨有門前偃蓋松百
尺陰森倚天翠傍無凡木可等齊曉色浮空照關市烟雲
會合疑有靈勢若蟠龍欲飛起十月大莖百物凋霜外精
神何最最冰風拂拂入高枝壯比秋濤動天地夜無神鬼
溪月明寒影扶疎過鄰里瀟灑不稱兒女情爛熳春光醉
桃李行人弗顧頗孤高月月栽培應有意造化能生歲寒

姿寂寞豈同花艸死固知人物各有施未必無時皆棄置
大厦如求棟梁材願作明堂報天子

趙葵

南仲蒲州人寶慶間拜相

秋浦樓

按樓原在城東宋紹定戊子郡守趙范移建
城西以路通秋浦也端平王伯大易名秀山

麗譙岌嶢壯城闕萬里關河歸目曉雨餘漁釣玉盃開
外芙蓉翠屏列吳頭楚尾二十秋滿耳絃歌聲未絕不才
濫綴鴛鴦行夜夢時還許歸謁蕭晨振策來翠微母憐吾
兒倍怡悅昔偕汝父君是邦舊事辛苦爲兒說星星鶴髮
簪霞冠笑看朱衣擁金節一門和氣皆君恩恩與天同酌

未得生平區區忠孝心歲晚願爲松與栢可堪清賞屬登
臨風景不殊人事別徘徊徙倚十二闌角聲吹上梅梢月
吳光裕 寬生青陽人明貢士有傳

窺園行贈董無爲 同方旋吉作

石城西偏湖山南何人結園飛翠嵐棟宇盤雲挹城郭野
花襍樹爭蓁蓁園中主人無爲氏日日窺園卧花底笑殺
當年不下帷腐儒局促蠹蟬似君今作達駕前脩讀書種
竹隨所謀胸吞秋浦千年澤筆埽清溪萬峽流抱鄰高歌
閱今古匡時豈必廢尋按精靈磅礴意態遠時時招客譚

瀛洲杏花邨近酒香撲我來每飲自擊筑門靜寒巖山脚
雲簾開晴浴湖頭驚手把長鑊斫月根天外飛鴻送遐目
目中景色誰最强風雲執擁氣高張董生乘之劃雄劍罔
兩走匿天低昂叢桂青青玉芝紫窺園真勝趨道傍

丁紹軾

默存貴池人相熹宗謚文恪

永懷堂歌

有引

李古源先生倡明理學扶盲起懦士習翕然先別
駕淵源率由此厥胤玉臺宛肖古源因以永懷表
先志罔敢隕墜今其孫邑博士諸賢羹牆雲樹兢

兢家學之繩爲顏質卿紀述無溢詞矣然到峴得
地見月知天伏而追先別駕曷禁拊膺其交相勸
勉宜何如也三復說詞爰歌弔古

堂開西郭曙瓏璁十洲眼底合鴻濛展岫襟湖湛碧空
人永懷卜築崇厥考一代號儒宗評騰古今廢羣蒙
吾家先子侍文翁江有岷陽嶽有嵩末世剝啄爭異
同詩禮庭中匪素風亢宗接武玉臺公宦業文情匹
孔融鑄就龍孫自磨礱騰英藝苑貫長虹蔚起箕裘
紹冶弓拳騁夜白產青驄在昔三槐手植工今見
僊李盤根隆何須金穴山爲

銅挹秀喬門妬桂叢

劉城

杏花邨

小杜刺州後風流不再來清淺平湖三尺水橫側習衣十丈萊黃公酒壚不可識稍添紅樹傍亭臺人說杏花村裏去演武塲門相對開

邵晃

泰夫寧國人尊甫鎮之孝廉由崇禎丙子麟經通籍連徵不起年登耄耄孝事泉石以終

杏花邨歌呈武兵先生

桃葉渡左武庫游閒終古無朝暮此日風虧十二門簫鼓

連天紛狐兔梅根渚稱孤嶼賈舶漁舟下上語蘆中人斷
日蕭蕭蘆花吹折傷心處不如行吟杏花邨憶昔從君秀
山門帶雨穿雲香細縵路比麴車有餘吞更有黃公酒上
壚頽斜似半醉泥塗雙雙飛出青林鳥口中猶唱十千沽
十千沽胡爲乎稽阮云亡河山邈世間誰識有故吾

吳

彥

味長高田人所著有竹莊詩溫陵黃虞稷選入
建初集中

杏花邨有感

池州城西玉臺起玉臺山畔平湖水四望烟波天欲低參
差茅屋杏花裏杏花名邨傳至今觴咏騷稱杜刺史刺史

千秋去不還山川未改將何俟雲樹依稀游者悲况復征
馬嘶不已風雨四時亦蕭蕭文選閣空曾無有以茲慘淡
幾行吟徒憶當年舊酒市酒香花放杜可來杜卽復來何
如矣振興大雅君其始

吳

綺

園次江都人

世祖章皇帝

詔諸楊椒山填

詞晉兵部郎出守湖州所著有粵游鴻雪集

題杏花邨圖贈郎趙客

小杜曾經刺此州佳名應自爲賢侯但今芳樹知多少尚
使行人欲往游君家本向花間住年少才高能作賦欲將
勝事繼樊川直須更種花千樹種就繁花樹樹春此邨還

合號郎邨我來只就君家飲莫問當年牧豎存

沈

賦

相如錢塘人所著有湖上草易簣時付之燕臺侯岳菴

杏花邨懷古

有序

郎子趙客秋浦才人也余神交者數載于茲矣去年夏胡子笑廂爲郎仲久隱君乞言于余已屬管城紀其略以報趙客秋九月胡子復手趙客徵詩啓索余杏花邨題詠嗟呼杏邨爲仕牧軼事余何人也敢爾繼響于是不復搦管今年春偶過池陽欲訪酒壚舊蹟桑柘遺踪且得與趙客傾倒以愜素心奈鞍馬控總不獲如願僅一望杏花邨路惟有長隄烟艸短徑荆扉而已怡然往昔感生于懷遂成小咏就正良朋並藉此以代謀面爰托胡子付之郵筒時乙卯天中節後二日

神游幾度杏花邨今日看山到華門陌上盈盈芳艸色春

風過處馬蹄輕遙憶當年邨外路續紛紅雨應無數只今
空對夕陽留烟光漠漠知何處太守流風繼者誰牧童猶
是杏花西才名徒結千年想我來未敢再題詩秋浦樓前
信宿返斜陽道上春風晚今之視昔已如斯後之視今當
更遠

宗元豫 子發興化人

讀杏花邨志有題

少誦紫薇句遙愛花邨名老作秋浦客頻來花邨行花邨
風景已非昔千樹名葩不存一轉眼繁華變劫灰迷陽滿

路冒行踪郎子奕世家邨中當年猶見千林紅搜輯詩文
遍今古牛腰大卷壓奚僮我謂詩文徒空名何如種杏復
成邨老夫乘興如相訪與君花下聽啼鶯

沈 琯

格菴浙江餘杭人

杏花邨懷古

昔聞杜太守沽酒杏花邨今過池陽道西郊名尚存空山
舞燕巢高柳玉堂人去春來久蘭亭紫澤成丘墟誰向前
邨沽美酒持酒尋花憶落紅昔年此地宴羣公于今艸色
斜陽上春鳥啼殘舊苑中

鄭 濂

蓮水上元人石渠司訓

杏花邨懷古

杏花月小天猶霜枝頭綴露垂珠光硯玉生波曉簾畔寫
券買花春字香刺史行春敞幽步城西雨濕行人路細水
遙通遠浦烟青帘低遶前邨渡醉裏看花氣槩還寶刀暎
面黃金鏤相思偶憶相逢處繫馬高樓楊柳邊君不見鐵
笛吹寒江上潮芙蓉紅淺冷山樵新歌舊管聲嘈嘈又不
見薜碣空林古道傍銀鏡蘆葉響漁梁鶯鶯燕燕何其忙
交湖千頃明如滌老樹長峰矗霄立爲怪風流不解愁天

涯芳艸連根碧

王著

必草繡水人與兄槩以詩画名于時

題画杏花邨圖呈還樸隱君

韓康高隱真仙境
端不種桃專種杏
逃名早避市人知
花掩柴門守幽靜
天台武陵焉足誇
引人多事笑桃花
安得烏衣如燕子
春風歲歲到君家

陳元鍾

孝受連江人

郎魯亭從其尊甫遊西郊見佳松欲移種家園余聞

作歌貽之

時魯亭方十歲

莫種松莫種松松枝松幹待至老纔能偃蹇作虬龍不如
種梅爲得手開花占在百花首他時肯折花下枝猶可天
涯寄良友主人聞言殊否否爲愛柯葉青共守世間萬木
俱蕭森此公獨有歲寒心漢武栢梁寧足道周宣桂殿徒
爲矜公輔唐堯成至治松階松牖冠古今天上擎雲等閒
事凌霜傲雪直千尋夜畔波濤來枕畔推窗月皎松間看
斯時天地寂無聲松影花陰兩堪玩靜極生悟古至言萬
頃文章煥河漢領君佳論自爽然歸去栽松書館前閒時
箕踞長松下爲君銓釋天人篇

錢又選

墨巢雲間人

遊杏花邨長歌

春曉出江城城西轉山麓隔林春鳥鳴花外多山竹三月
杏花盡開竹籬茆屋起山臺山臺幾處面湖水時見遊
人花下來乘興徘徊日漸長春風猶帶杏花香西家買酒
東家醉花下春風拂鬢涼嘆我半生短鬢白故鄉却是無
家客花應笑我白頭翁我只對花常痛惜花謝花開憶昔
時昔時名勝復何知憐花只欲當花哭惆悵風流杜牧之
牧之臺榭變荒丘惟有春渠埜水流埜水生時見春艸使

人憔悴不勝愁我今故來訪主人主人郎子交情真兩人
復入杏花裏相對論心如飲醇說我十年客秋浦羞添貧
病成老腐可憐潦倒不堪言大拙只今無巧補今日對花
結好友錢郎二子共詩酒何時重過杏花邨平天湖上盟
邨叟我欲置林泉試問君可否指我卜居人君當笑攜手
天下士應如此花飛猶自怨青春回首斜陽情不已君不
見九十春光欲盡時春光一去疾如矢我輩意氣滾一醉
眠花底還訂年年約莫教春恨矣

楊之柱

玉擎武進人

書杏花邨別業圖後

有序

子客貴池學博署中未及一句卽逢重九因與諸
文學縱步三台山間俯仰風土以廣足跡之所未
經約行半里許第見山原清曠石徑逶迤同人告
予曰此卽古詩所謂杏花邨也相傳唐刺史杜牧
之行春問酒舊處歷千百年來滄桑代變景物催
移惟香泉井尚在耳予低徊不忍去者久之歸而
捉筆志感有欲尋刺史畱題處惆悵西風落照邊
之句居無幾得交郎子趙客相見恨晚道及前此
勝游知杏花邨卽祖居故里自宋司馬文韶公至
今所從來遠矣因出手持扇頭墨画示予予初不
解最後閱其題白迺檀子爲趙客所寫杏邨別業
圖予又不覺啞然失笑輟思曩時游覽風景宛然
在目而叢林疎樹之間有室焉此中異人可想而
知也披覽之餘聊賦短歌以識于後

寒風落日賓鴻飛飛我飄零書劍將奚爲十年奔走歸塵

裏旅寄池陽得幾時岐途暫假甚寥寂忽逢郎子鬚眉錫
傾蓋相知如故交酒後酣歌唾壺擊此中投契欲何如明
月松雲把卷餘可嘆人生多不遇我倦遊兮君幽居美君
才俊年尤少文章標格特高妙杏邨舊宅比輞川卜築於
斯供覽眺何處尋來顧虎頭獨開生面爲君畱胸中別自
有丘壑醉墨淋漓寫照幽君乎君乎棲別業令予可望不
可卽西蜀南陽是也非其間有個真人杰山之曲水之隈
任憑吟嘯驚風雷我欲携茲尺幅圖遍質諸石城秋浦之

高才

蔣瑤芝

素書懷寧人所著有夜光集

趙客集同人小飲杏花邨

君家世居杏邨裏三十年來存舊址尋幽結伴出西門緬
想風流古刺史寥落猶存杏幾株欲問青帘何處是乾明
冷寺佛莊嚴古鐵丈六生神理栖雲萬竹流鶯聲消遣天
風來客子齊山新翠浮石色映帶百尺浮圖起壚頭小飲
發嘯歌西郊快游從此始高談往事忽悲壯將軍游俠兼
名士

談左寧南東下趙客令祖仲久隱君以數語退師及南渡皆黨旤諸君子

老蒼白髮古牛

翁筆底澄徹無纖滓讀書種子斯人存嶧桐樓山已往矣

遙指杜鵑古清溪重來一棹待秋水酒酣拂袖倚樓邊斜
陽萬疊暮山紫

吳非

杏花邨小集和蔣犀影韻

近歲未頻過邨裏偶往偶來觸廢址爲嘆從前盛與衰載
事闕然失古史唐詩名有郎士元遙傳風遺趙客是作志
紀邨邨自來搜求分帙粗就理招客携錢掛杖頭由北而
南推蔣子相從四望步逶迤山影江干斷以起植婆太婆
峙東西片石齊山誰索始當時楚友號南公

謂杜
荅畧執卷游

談天下士焉得我輩之文章如此湖光無塵滓無塵滓爲
三字評蔣子賞心何如矣狂言交借酒杯銷遣興驚濤風
湧水已忘日暮射城闌行行把手霞映紫

以杏花邨圖香筒貽趙客詩爲之賸

有友蜀人漢室後貽我香筒佩已久攻竹之工失姓名雕
鏤精巧推高手週迴一幅杏花邨圖出沒重疊曲以迂楊柳
依依垂雨際牧童牛背指誰酤分明所取杜詩意画題併
見力筆製刻畫玲瓏氣中通氤氲交密烟雲醉爾是邨中
人邨今以爾名譬諸草木吾臭味一薰十年有餘芬願因

割愛遙爾贈聊作短歌以爲賸

蘇應璩

肩麓石埭人文名與兄應秋埭爲學憲鶴洲先生子時號三蘇

杏花邨

池陽二月春氣淡清江水溢春波新波影搖紅上春樹枝
頭春色開遙岑遙岑曲曲青帘下湘簾半捲花低亞寶馬
嘶回錦犢車千金不換春風價誰家鍊笛暗飛聲芳艸天
涯無限情古鳴藤垂鶯語路明湖翠冷遠山亭醉來欲傍
黃公住不記當年放歌處笑指高樓楊柳邊又向前邨踏
花去

許承家

師六江都籍歙縣人乙丑會魁選翰林院庶吉

池陽賽會歌

遂注吾池賽會始于西席凡名賢歌咏因採入之以志里巷之俗云

池陽風景堪驚怖
樸遼繁華如代戍
我初走馬虎林城
人物蕭條向誰語
非無七貴五侯家
堂上棲烏啼日斜
亦有千金遊俠子
鶉衣芒屨直相誇
下馬高歌悲復喜
義黃遺無乃是五陵豪
客滿江南安得風光淡如水
一朝羅拜文選樓
蕭梁太子歷巡遊
衆香繚繞高會合
縞綺繽紛眩人眸
燕綺吳縞何足美
飛綾拖玉連雲起
非烟非霧赤霄袍
踏雪凌霄丹鳳履
無端瑱琤紛迷離
山海之藏少人知

昔時不識金銀氣此日還擷珊瑚枝珍奇布列滿城郭光
燄層層動魂魄豈知簫鼓騰高空又向雲邊數臺閣臺閣
創制非古先巧思人妙偃師傳重檐飛栴千絲力霄嶸蒼
垠十指懸上有童子凡三五亭亭直立空中舞如何騰步
少絲連但見雲烟裊秋浦道路蹊蹊喧江門驚心駭魄不
能言羈客幾人腸欲斷相視大笑鬚髯掀回首廣陵歌舞
地廿年良會今誰記可知空負紛華聲弔古何人解顛顛
君不見池陽珍錯天際來入門榛莽餘長慨

吳孟堅

小山邑人北直大名籍

杏花邨歌

我生秋浦萬山裏志在四方懸弧矢廿年浪跡遍天涯江
國湖山收筆底回首從前事已非麒麟成塚狐狸肥名園
勝地莽荆棘多少亭臺烏夜棲東南西北何堪說約略出
處心愴惻何處東山舊主人卽今粟里遺碑石桑田滄海
真可憐千秋萬世幾人傳丈夫自命須不朽目無今古悲
前賢前賢往矣不復作地以人名寧寂寞杏花邨立自有
年杜牧反藉邨詩傳君不見郎子構別業毅然續前人我
願郎子立萬仞對我古牛岡之岑更願郎子渺四海出口

當流千載聲

郎遂

三台山搏虎

別見雜記

花邨負郭非山谷茅菴小結中台曲赤日當天鳴午鐘忽
然猛虎當門伏邨叟驚言昨夜來曾渡橋西入人屋于今
虎不匿深山何怪人情明肆毒嗟爾竊毛文號班生來性
暴盍自淑有時勢失尾長搖持刃前驅誰敢逐人人惡爾
虐何多欲寢爾皮嚼爾肉我今悲爾可知藏居然得意下

山麓

杏花邨志卷之七

邨人

郎遂

編輯

題詠

律詩

五言

陳舜俞

令舉嘉興人慶曆中舉制科第一按景蕭樓詩序有同官持杯落成之句似嘗官于池者

秋浦亭

卽今清涼境址

牢落真秋浦江山滯客舟身同雁南去心似水東流鷗鳥
荒烟裏漁人古渡頭只因山色好來上九華樓

潘闥

逍遙子宋人

夏日宿西禪院

卽今乾明寺址

景

此地絕炎蒸深疑到不能夜涼如有雨院靜若無僧枕潤
連雲石窗明照佛燈浮生多賤骨時日恐難勝

喻良能

叔奇義烏人淳熙中過池州

展敬文孝廟

二首存一

才昔高南國名今播八紘英姿畱此地餘澤及編氓仙去
江山在恩來日月明經從千載後欵謁薦微誠

沈

通

德亨貴池人景泰三年歲薦官榮陽令邑志列之賢哲

題友人西郊書屋

卜築城闌外居臨杏鴨西桑麻深繞屋桃李開成蹊種竹
開新徑移花帶舊泥小園閒坐處幽鳥一聲啼

徐紳

五臺建德人嘉靖辛丑進士官至都御史

謁昭明祠

郡城西郭外蕭帝有遺踪圖史分東觀應劉儼侍從維城
連楚越作鎮控誰戎尚想崇文日兼收七代雄

張思曾

青陽人登嘉靖己酉賢書官魯山令

罷官歸里經杏花邨故居

鱸肥方返棹悵望此邨幽故里翻成客名園作廢丘難逢

小杜輩喜共老僧遊紅杏曾餘幾重來問酒樓

余翹 聿雲銅陵人孝廉

夜過杜鵑

自注秋浦有石中鰐形甚薄而味甚美土人呼爲壓魚

盡日帆穿樹連宵月在船犬聲寒吠棹漁火遠燒天甘汲雲崖溜鮮烹石穴鰐此中美風物鼓枻督長年

劉光謨

觀明邑人廣西養利州刺史

乾明寺僧房次余燕南孝廉韻

乾明池上寺乘暇特來攀石古蒼痕滿亭虛翠陰環泉聲
清楚譯雲氣淨禪關七碗風生腋還心寄海山

爲愛林間寺尋幽儘日攀
磬鐘喧亦寂香靄斷仍環
白社忻相過紅塵澹不關
話深歸去晚新月遠卽山

孫象壯

子輿青陽人崇禎乙卯貢舉郡志文苑有傳

秋浦亭

卜築城西敞停驂廣見聞
醉吟秋浦月清嘯參山雲
鴈字參差亂漁歌唱和羣
隔江亭子上簪筆屬誰文

顧元鏡

韻發歸安人天啓末出守池州崇禎間復爲觀
察使文章政事至今猶傳頌之詳見傳

杏花邨

牧童遙指處杜老舊題詩
紅杏添新色黃墟憶昔時
遠山

層作画好鳥解吹簾偷得餘閒在官錢換酒卮

李學沆

靖孩湖廣江陵人少尹有傳

春日飲杏花邨邨在池州西郭外家君作令時始以

一碣爲杜老標靈嗣太守顧韻菴先生緣置亭榭

迄今遊觀不啻牧童遙指時也

流寓三年滯携琴幾度來花經兩世艷酒則萬爲杯不擅

詞垣賦翻因碎錦催窗虛得月早徙倚醉忘回

千載誰標杜行人復見邨風流思守令芳艸集王孫杏汁

同知味酒帘尚半屯我魂亦欲斷愁向此花言

周廷鑑

泉州人宮詹

鐵佛寺作示我如上人

鐵佛何年寺遙傳宋紹興神工勞大冶心印問南能巧鑄
終成錯就空未了僧杏邨無酒肆隨處現金繩

吳光錫

少友九華人

九日湖山登高因徧游諸菴

樊川仍缺事問酒失湖山九日翠微上千秋悲弔問何如
西一帶水樹盡縈環近頗游人盛予儕實始攀

步引樹蒼蒼西林徧佛場茶供秋露白籬想菊花黃落日

孤帆迴荒烟倦鳥翔
匏樽應未倒歸盡紫萸觴

劉城

西郊四首

晴好出西門杏花空有邨
廢畦畱菜甲古佛閱苔痕
樹隱遠山宅人傾近市尊
不堪談昨歲戰馬度高原

覽時來物感妮古亦心還
寺始梁天監碑存元魯花
繁苗隨意苗麥穗待風華
俯仰多興慨西春日易斜

關心最幽勝古廟祀昭明
帝子文章伯巫人耕牧生
書成傳選體魚美錫嘉名
此地堪長憇林深着霧輕

紺園頽亦古豐碣蝕猶佳僧鉢遭兵焚神龕綴壁蝸分經
小果法賽社衆人俳宴坐驚幽響啼鳥過水涯

譚巖

維石青陽人隱士

杏花邨訪友留題

遠樹荒邨外清沽埜店中湖山曾有約懷抱頗能同書永
鳥啼寂風乾雨勢空上方鐘磬起惜別意何窮

郎才

文玉邑人所著有浙游艸藏于家

過杏花邨祖居廢址

見郡志

不似當年勝依稀風景餘青帘招酒客綠樹繞邨居愛此

成幽境仍堪結艸廬行行復止悵望欲何如

釋悟明 白开乾明寺衲

杏花邨

爲羨茶經品牽來入醉鄉
洞仙丹裏意童子指頭嘗花沒
春長在泉枯井尚香誰從三斗後
玄淡問羲黃

甯 峒

上巳游杏花邨

快有尋芳侶花飛正暮春
感時多古事偶客一閒身
陌上采蘭女林間鬪艸人
帘搖茅屋下沾酒共逡巡

陳其勲

公坊鸞鄉人順治乙酉舉人官瀘溪令

杏花邨

次友人咏池陽八景之一

郊外尋芳艸坡前境轉通
喬松浮水綠古杏映苔紅
笑傲餘閒裏乾坤一醉中
興來談往事誰是牧牛童

徐哲

山甫興化人由學官陞令長以文藻著

杏花邨

小杜風流遠芳林勝事存
春寒深二月凍澁澹孤邨
想像枝頭爛歌呼樹底樽
待歸庭杏放一倍醉花魂

邵晃

秦夫宛陵人詩友有湯燕生江左齊名

寄杏花邨主人

杏邨啼鳥過花雨幾舍情佳麗時猶醉弁沉感亦生夕陽
浮月夜空翠看嘒嘒莫待秋風至吁嗟憶鱸羹

鄧漢儀

孝威泰州籍吳縣人

乾明寺

尋花無意緒撥草有攀躋松枯穿雲立江山抱寺低佛纔
支劫火僧久厭征鼙鐵笛竟何在黃鸝春自啼

劉始菑

昌石河南杞縣人

登湖山思家

江城搖落早蕭索又涼天聚首知何日離家忽半年雁從
雲外杳愁向夢中牽幾到湖山上吟成意悵然

方膏茂

敦四桐城人孝廉

鐵佛寺

老僧憐我衣屨屢闢禪關笋煮花前水茶烹屋裏山語深
兼世內心靜出人間已識浮生誤聊偷半日閒

宗

觀 鶴問廣陵人

壬戌春游杏花邨

步屨杏花邨平田帶郭門晴嵐浮遠界深樹出朝暎春到

蕭樓改

文選樓時
移建秀山

山空杜鵑存江南真異候烟柳勢先暄

秋日游杏花邨

邨小平林近幽尋不遠城無花嬌白髮細雨誤清明霜逼
湖痕降蘆衝雁陣生酒帘應笑客搖蕩比心旌

劉廷鑾

與父號梅根

嶧桐徵君長公

西郊和韻四首

人來笑閉門步屨欲邨邨柳發今年浪楸移去歲痕雲橫
長負石日薄始開樽古色雖相戀驚魂尚在原

古道沿坡上春江路不遐犢依垣外草騎擾澗邊花風上

生民朴雲山爲我華交謹游子屐取醉一行斜

廟榱頽瓦震寺碣剝苔明幾衲擔鋤老羣烏近殿生祝傳

周氏姓

西佛廟

鑄宋人名

光孝寺

吾欲依棲久孤霞入暮輕

春暖僧寮敞烹泉味故佳亭桓全宅烏梵貝半巢蝸祀事
悲今儉祠官笑昔俳西湘流不斷過此問生涯

吳非

西郊和鐫徵君韻四首

秋浦舊西門行觀隴上邨壇墮存廢址堰塞漾新痕
藤梢屋人希竹葉樽相看嗟去歲兵燹實燎原

閉戶心嘗靜看山意更遐烟迷昨夜柳雨發早春花下澤
苗方透陽坡草亦華平沙入望遠飛鷺幾行斜

昔人傳鐵笛光孝卽乾明澗淺穿沙去林叢襍木生秀山
原僻隱貴口舊知名爲探西祠勝乘風體亦輕

神道藏深艸山門古意佳井華無舊鮒楔墮有黏蝸荒殿
僧今朴幽林鳥尚俳起看雲氣溼暝色半天涯

甯澳公招游杏花邨

澳公名洪斐
今僑寓粵東

市中嘗閉戶期我出邨行花憶當時勝人無此日情杜詩
賢太守黃酒古先生步履徐徐去追懷幾歎聲

何其偉

梧子連江人侍御

送陳孝受池陽省親因憶杏花邨文選臺

出門望江樹馬首向吳春行作名山重詩非近代人舞衣
萊彩異邨酒杏花醇臺有讀書處看君日幾巡

顧咸泰

思菴蘄州人大名令

杜湖

秋浦似湘庭迢遙烟水青舒谿睇菊所華堰憶昭亭旌
搖朝徑湖堤冷夜螢何時郊馬息携酒向徽寧

蘇汝霖

鶴洲石埭人粵西學使

郭昆冶太守招飲鐵佛寺同宣允公郡丞姚六康明

府李宜埜孝廉

刺史風流甚招尋集衆賢爲攜陶令酒一問遠公蓮黃菊
侵禪榻丹楓點客筵殷勤卜永夜傾倒佛燈前

裴國熙

寧野奉天海城人皖江郡丞

杏花邨

見製錦編

雲壓半峰低絲絲柳帶迷花飛移小徑燕掠送殘泥牧子
猶橫笛游人只傍谿湖山非昔况常聽竹聲西

沈廷璐

元珮宛陵人

耕巖徵君之孫

寄題杏花邨郎氏別業

黃公墟外地新築興偏賒靜著名山業閒栽上苑花窗應
通澗壑逕想入烟霞此日遊人過何須問酒家

楊森

嘉樹江西東鄉人布衣

杏花邨

千載詩人地無花亦此邨茂林還酒店芳艸自柴門飲有
提壺勸耕聞布穀喧亭臺如可復不異牧之存

陳肇復

問義福州人所著有刪訂宋史一書

過杏花邨役指道旁井云古之香泉也試嘗之戲成

此詩

自注水自石罅中出者曰瓊漿玉髓

清識襟中味誰言泉更香不堪滋口腹也可滌肝腸海到三山澹河流九曲長回思舊隱處朝暮飫瓊漿

夜至鐵佛寺馬上口號

用正韻

覺有邨烟近秋風漸不平深林聞犬吠古寺聽鐘鳴世路忙爲客吾心淡若僧誰知歸宿處猶隔一重城

按陳公之官池贊府也由宰蜀大昌守須所納不應最不書因貶池州經歷署齋清靜與子元鍾考論今古名聞當世久之署蒙城篆萬民乳金書姓名公製衣一襲志不忘又署霍丘篆民咸德之以引年致仕池士大夫賦詩祖餞如楊司業故事歸裝僅著書盈篋而已

附郎遂送別陳參軍致仕旋聞詩曰乞得乘秋放
棹回拂衣長嘯好懷開風高播自翳山曲澤偏流
通浦水隈歸去千秋重訂史折來一柳進離杯聞
南有雁飛江左莫吝雲箋爲我裁

鄧世樾

乾符虹縣人寧河王後裔

和趙客杏花邨元韻肅此誌別

時休致
還里

莫漫嘆丘墟花間好結廬君能橫槊賸我欲帶經鋤開卷

曾窺豹垂竿不羨魚却憐歸路杳別思復何如

余思復

不遠將樂人黃冠道服游歷三吳間

池上晚晴寄陳孕采兼訂遊杏花邨

返照出重陰垂陽樹樹金殘紅明屋角嫩綠漲湖心坐見

齊山好遙憐秋浦深
杏邨春未老從爾更幽尋

林搏雲

龔鯤武進人歷任貴池含山教諭

杏花邨

尋春古杏里出自秀山門
問酒猶餘井無花幸有邨喧聲
聞紫燕緩步伴青猿
小杜風流在還期整舊垣

葉爾亨

子謙江寧籍桐城人宗伯葉燾之孫

過杏花邨

古蹟西郊外停車獨倚闌
苔深浸篆綠楓老落花丹
酒市荒邨少霜天牧豎難
不知秋已去猶作暮春看

華黃

中涓無錫人已未進士

雨後過杏花邨

晚眺出西郭山山新雨痕樹深藏竹塢石淨洗雲根鐘磬
初禪地笙歌舊市門杜公會問酒今古杏花邨

曹繼參

鄮升石埭人明經

西郊

頻年兵燹地景物幸猶存寺古鐵爲佛花明杏是邨可游
皆舊跡借問有芳樽更愛年年綠平鋪到郭門

錢又選

墨巢雲間人

杏花邨

提杖出城去橋西一徑通
亂烟堆樹白疎杏遶溪紅
蝶舞
埜花氣鶯歌春柳風已來遙指處沽酒問邨童

危映壁

東原貴池人戊午舉人

杏花邨次宗廣文韻

城西舊有邨籬落接蓬門
林黯成秋色山明逗曉暎
酒帘
行處是杏樹幾株存那得游人醉風高景亦暄

王之珂

玉鳴蘭木人所著有聽竹軒集

寄友人重開杏花邨

自愛名邨勝非關憶昔賢山閒雲亦秀湖滿月尤娟老樹
參差出時花次第妍古原由我作高咏已盈篇

吳綺園次一字聽翁江都人

游杏花邨以雨不果同趙客分韻蓋邨爲其世居也
亦有樊川興尋春老漸疎偶同聽雨燭竟阻看花輿山水
逢佳士烟霞憶舊廬莫吟魂斷句霽色晚來舒

錢覲日天浙江龍游人鍾山趙廣先門人

前題

杏花邨裏路杜牧昔尋春地勝人猶在名高跡未陳山川

堪覓句風雨竟迷津客思無聊甚何如一飲醇

吳壽潛

彤本 聽翁仲子太學生

前題

欲訪樊川跡泥途躡屐難天心如有待風雨竟無端小飲亦成趣勝游仍未闌新晴應更好繫棹入烟巒

郎遂

吳聽翁諸君游杏花邨以雨不果分韻得五微

小杜名邨在游人阻雨歸未尋紅霧醉空望綠陰肥嘯詠留山水烹茶剪蕨薇自經離亂後蕭瑟冷荆扉

喜宗遺山先生秉鐸秋浦因號杏花邨客賦此贈之

吏隱先生志湖山托興長登臺懷趙宋遺選弔蕭梁

池州有宋

仁宗勅賜牡丹臺並

詩酒才人裔琴書處士鄉

先生爲方城公之餘

梁昭明太子文選閣

同里有王築夫李艾

繁華何足美名世有文章

山陸玄圃諸隱君子

自吟山響集人沐少文光才並咸園子官居博士堂談經

風入坐落紙墨生香別號花邨客重題碎錦坊

曹晟

集孔邑人所著有磬間詩次

西郊

邨家離別少世代錦雲中芳艸一湖綠春郊十里紅雨收

烟笛在郭靜酒樽空坐惜風人遠閒吟懷杜公

吳 鉉

周音遼東人正紅旗

雲松署齋坐雪與友人訂遊杏花邨

作客三年裏諸峰靜曉衙其于蓮嶂雪因念杏邨花策馬
風將度看山日欲斜有懷誰會得君曹許偏賒

孫之綽

梁樹青陽人

杏花邨

正值花時節尋花又到邨林開詩伴展艸掩酒家門艇影
春潮亂鐘聲古寺存主人能著述風景記桃源

律詩 七言

杜荀鶴

彥之石埭人築別業于杜鵑晚唐

閒居書事

竹門茅屋帶邨居數畝生涯自有餘
鬢白祇因秋練句眼昏多爲夜抄書
雁驚風浦漁燈動猿叫霜林橡實疎
待得功成卽西去時清不問命何如

按彥之閒居當卽在杜鵑別業或疑在九華齊林
間與詩中清景不合

贈湖上漁家

湖上卽
今杜湖

見君生計羨君閒求食求衣有底難
養一箔蠶供釣線種

千莖竹作漁竿胡盧杓注春釀酒舴艋舟流夜漲灘却笑
儂家最辛苦聽蟬鞭馬入長安

按末句聽蟬鞭馬四字此時彥之必登第以後歸
別業贈漁家也雖云得意不無辛苦之嘆僕僕風
塵何若悠悠泉石也

羅隱 昭諫餘姚人流寓秋浦築別業于梅根有傳

文選閣

間生元子出蕭梁作選爲書化萬邦三代已來成冠絕六
朝餘外更無雙今朝集是羣英仰昨日談非衆駐降輔國

安民新試問滕王空有閣臨江

按梁字在唐爲出
韻然唐人多有之

伍

喬

貴池人南唐保大十三年舉進士第一官考功郎有傳

游郭西西禪院

遠岫當軒列翠光
高僧一衲萬緣忘
碧松影裏地長潤
白藕花中水亦香
雲自雨前生淨石
鶴于鐘後宿塵廊
游人戀此吟終日
盛暑樓臺早有涼

汪遠猷

宋人

昭明廟

生爲明哲沒爲神
一點英靈看處新
秋浦溪山最留意
法華禪定是前身
九州托庇陰功大
六字加封寵渥頻
更有

使君書事實幽沉從此愈昭伸

方元美

見前 以後俱明人

雨中經杏花邨問黃公故跡

酒泉太守醉鄉侯紅杏邨前覓故丘
實計青山留粉黛虛傳黃鶴換春秋
抱琴今古誰知己荷鍾西東笑浪游
大道清明人事舊祇今風雨欲誰求

陳牲

二生廣東人

遊古杏花邨兼過鐵佛寺

石橋剛轉信幽奇滿徑寒雲兩袖披
茅屋淡香薰酒氣坐

牆紅影露花枝帘隨烟捲分邨路鳥帶山飛人客屨遙指
松陰藏古寺忙歸及雨未來時

丁紹軾

文遠貴池人大學士

劉廷尉同齊山人過小園投詩贈禽

園堂初敞傍城隈邂逅欣逢二妙來好隱直追陶令節依
劉又見仲宣才墜成白雪愁花鳥酬此青山只酒杯却訝
臨邛能致客五湖烟艇莫相催

李學沆

靖菴江陵人施州衛籍

西廂

家君令茲邑曾見唐宋來諸
誥勅今甲戌則火於守者矣

高齋何幸得躋攀意味千秋尚雅嫺
埜色只堪雲去住空庭時見月來還
若延梁祚安存祀賴有僑居永護山
唐宋寶符悲劫火登臨不禁淚潸潸

方拱乾

坦菴桐城人宮詹所著有何陋居集

无我上人來自西川久栖杏花邨將歸成都賦贈

大開關去小天涯池蜀迴旋路未賒
和月和烟隨衲擔好山好水盡僧家
晤談不拾三乘唾投味只真一鼎茶
信步行來循戒律何須板板着袈裟

方叔邵

虎玉桐城人有傳

同汪孝廉游西郊留題鐵佛寺

春王便覺杏宜寒
出郭連蹊雨未闌
北道清平從賊擾
南天戎狄向祲看
身同佛子參頑鐵
選逮蕭儲儼帝冠
石滑酒酣頻踏去
獨嘲鶉結走江干

戴易

南枝山陰人

杏花邨

何年令節記中和
十里東風艷綺羅
行盡小山春樹好
歸遲爽氣夕陽多
杏花無夢鶯聲老
茅屋多情燕子過
忽憶舊游詩句在
我來懷古正如何

何其偉

梧子福建連江人官至侍御所著有濤園集續遺民錄諸書

弔杏花邨郎仲久隱君

少微星暗冷雲平
烏杖衣冠閉一塋
義重揮金管處士
功高飛矢魯先生
杏花雨暮殘紅泣
秋浦天空咽水鳴
無數白楊扶墓表
千秋獨有布衣名

吳自任

乃尹銅陵人貢士咏吟甚富晚年悉焚之

杏花邨懷古

一帶烟邨古路幽
名山遺跡羨風流
漫看柳浪迷漁艇
猶愛花開傍酒樓
雨裏留吟唐刺史
雪中高卧宋賢侯
牧童

不是尋常指紅杏春深須醉遊

宋實頴

旣庭吳縣人登順治辛卯賢書海內推爲文章師表所著有玉蓉山房詩

寄題杏花邨爲郎趙客

旗亭微暖杏花天蝶攘蜂喧欲禁烟
落魄行人常問酒風流太守漫題箋
壚頭片石承紅雨山外孤邨鎖碧鮮
聞有郎生尋舊蹟閒書名勝已成編

周體觀

伯衡遵化人由翰林院歷官兵備道

杏花邨

池州城外杏花邨細路平林對郭門
爲許牆帘招杜守獨

留隴笛憶王孫江融彭蠡春帆影山疊清明夜雨痕累代
蕭條聊駐馬依然風物動高原

王

穀

椒卻江都人陝西岐山令

杏花邨集句

詩風又起浣花邨排比花枝滿杏園幸有香茶留釋子不
堪芳艸思王孫高山遺老猶存社魯國諸生半在門相約
杏花壇上去爲君惆悵又黃昏

章孝標

趙嘏

李嘉祐

韋莊

周祚

劉長卿

李羣玉

劉長卿

故國春風歸去盡今朝始見杏花春青莎滿地無三徑綠

樹重陰葢四隣詩酒尚堪驅使在風光一任物華新知君
苦思緣詩瘦閒向江邊采白蘋

陳

陶

張

籍

李

紳

王

維

杜

甫

胡

曾

杜

甫

于

鵠

趙千里

昂若臨淮人明忠烈武畧將軍九世孫菊江司訓

杏花邨

杏花邨裏美幽棲憶自唐傳杜牧題花罩酒旗春自馥邨
分詩韻日堪携須知勝地名常著言念風流徑未迷欲向
此中時着屐青編展處有青藜

甯峒

與家澳公攜魚重過杏花邨訪友留宿得魚字

繫思勝友獨閒居雨霽重尋到草廬篋底感時多作賦林
中結伴靜攤書牧童邨晚歸耕犢鐵佛聲寒送木魚爲美
此間羸雅集秋宵詩酒樂何如

陳希昌

秉文祁門人明經癸亥聘修江南通志

題杏花邨并寄郎趙客

最愛池陽饒勝蹟城西爭美杏花邨黃公美酒鑪安在杜
守高風詩尚存我昔停車一問俗君今愛客屢開尊勞人
何日重來此觴詠篇章次第論

沈宜銓

隨菴錢塘人中翰

寄懷杏花邨友人

應是前身杜牧之聞聲曠地足相思豈知折柳時偏促欲
共評花事已遲廿一自宜增舊史十千無復貫新卮他年
嘉樹還如錦可許鷓鴣再寄枝

華 袞

維嶽濟山人

過池陽杏花邨有感

牧童指點古清明贏得于今邨有名牛樹已無難問酒孤
墟猶在尚含情漫言事往空懷舊好教詩成再寫生山水

式靈招客至栽成十里踏花行

吾鄉也有杏花邨不是唐時賣酒罇
樹近石塘春似錦名高秋浦址空存
芳菲已盡留丰韻綽約徒思寫墨痕
董奉術高堪紹學欲從此地闢香魂

錢錦城

臨臬常熟人牧齋先生嗣孫所著有卧雪集

懷杏花邨郎趙客

水抱山環結此邨詩傳杜牧至今存
絕無俗韻依秋浦別有佳名號煥園
人自誅茅常閉戶客來看杏便開樽
綠子好友頻相憶迢遞江雲繞夢魂

周

蔚

君豹號雪顛桐城人

寄懷杏花邨友人

星聚三旬抵十年分方又賦隔江天眠雲我占青山色

時余

築眠雲居于青山之麓

望杏君游紅霧邊有約共酣桑落酒無緣同

上木蘭船幽光肯發憐才甚慚愧支離費紙錢

乾明寺

郭外香臺舊種幽宗風吹散雨花稠已無顧凱滄洲興

顧韻

哉太守種杏建亭頗稱極盛

尚有方干醉墨流

吾鄉方雲山有詩題寺壁

松子落分

簾外靜

宋楊振有味寺中古松詩

笛聲寒挂鹿門秋

唐西峰聖者留鐵笛於此

三生

共話因緣晚不止瞿塘烟櫂游

方

邕

堯民涪溪人遺稿多散佚

同姜斐園陳秀巖小飲杏花邨因懷誰江邵南宮

踏青因雨數旬淹勝日同人間酒帘剝笋浮觴傾白墮飛
花點席亂紅鹽側身千古懷黃始轉眼三春付黑甜老筆
應知隨歲禿空輸年少鬬新尖

清明同柯子將諸友游西郊時予有同修郡志之役
讐校分明異索居郊西攬勝值公餘邨逢花酒情無盡客
有鄒枚愧不如太子衣冠留堊寺前朝碑碣薄丹書歸來

痛飲成高會
齒盃看錢卹用醵

江一經

式繩建德人蒲圻令遷溪德參軍屢建績廢疆所著有書種堂集

登湖山頂

郊西聯袂共尋秋
綠橘丹楓倚杖收
栗里人閒宜選勝
漢陰機息已忘愁
徑迷古道紆猶陟
水落空江靜不流
長嘯峰頭雙眼濶
作歌應與記來遊

茗飲華嚴菴後經黃公井

良辰景物總堪圖
此日欣無吏詎租
茶椀留人叅半偈
風帆入望下三吳
湘潭放逐惟餐菊
秋浦登臨好佩萸
徙倚

井欄帘影寂汲泉猶憶舊當鑪

置酒鐵佛寺

漱澗湖光漾綠蘋過從鹿苑接支賓尊尋淨土黃金菊塵
屑芳筵白玉塵元亮不嫌充遠社廣成端可問前身聊簡
載得烏程滿擿醉同欹錦里巾

晚歸自杏花邨

茶泛花甕酒泛樽藏鈎射覆送黃昏交情古處歸前輩卽
事新詩擬外孫鐵佛洪爐誰補鑄石牛孤渡那追奔憑將
空色商儀狄一指天龍在杏邨

陳錦宁

展侯貴池人明經

前題次韻

環城山色爽高秋宿霧偏從杖底收
適趣鳥如能解語無名草亦足療愁
蓮開九子浮晴巘練靜千帆穩碧流
回眺星辰手可摘翺翺疑與謫仙遊

相携三笑倩誰圖

謂山僧隱谷

興發從教吏索租邨鳴逢人還

識杜蓴鱸對客漫思吳

謂昌箕式繩

濤生埜籟連天竹香散空

花匝地萸共飽伊蒲忘力倦釀泉何用舊時鑪

霜老芙蓉映水蘋遙天嘒嘒雁來賓
鐘疎古寺重聞梵葉

落寒山自遠塵探韻雅成詞客座談經驚見宰官身

昌箕
着僧

昌時作禪
語相參

莫嫌白社頻呼酒元亮曾從漉葛巾

天集良朋醉綠樽黃花採罷夕陽昏但令落帽人如孟不
問相嘲座有孫幾樹倦鴉乘暮噪半肩行腳望烟奔勝遊
更覺歸途好隱隱漁燈傍水邨

張

惣

僧持江寧人

過杏花邨寄懷王紹李

池上詞壇郎士元每稱摩詰爲余言詩傳秋浦風騷見人
在輞川丘壑存問我曾經桃葉渡懷君常寄杏花邨蘭溪

訂訪知何日無限相思難盡論

周南

汝爲桐城人順治辛丑以草莽臣伏闕上疏

晚游杏花邨

散步荒原踏晚霞烽烟靜處有人家
小山歷落飄紅葉野水澄明點白沙
古寺尚能容鐵漢老僧何用付袈裟
天高風急飛塵土九月重來問杏花

過杏花邨懷郎仲久隱居

杏花邨畔老漁樵猶向行人說
兩朝才子竟同荀
令史將軍不數霍
嫖姚還山採藥狗
丹竈出世逃禪度
石橋三十

餘年追往蹟一時回首望雲杓

宣紹中 允公息縣人長沙太守

展拜昭明太子廟

爲愛溪山一問津
選樓爭望後車塵
生憎喪亂遊茲土
沒定精靈眷我民
乙夜雲旗來帝子
千秋香火奉才人
卽今夜月瑤璃碧
裘帶分明得似真

汪穎 鈍子漢陽人

杏花邨

風流小杜擅詞場
好句吟來字亦香
映月籠烟開画譜
披

雲帶雨入詩囊高懷自是探花使
埜興行看碎錦坊不是
武陵舊津渡恐尋春色誤漁郎

章世德

楓菴貴池人壬戌進士

杏花邨

風流太守舊題詩錦里春光想見之
紅杏久凋前代樹黃
爐空剩昔人碑牧童牛背吹殘笛
漁子湖頭理釣絲有客
閉門耽著述

謂郎子趙客

欲携邨酒一探奇

彭師援

嗣淵華亭人燕又孝廉小阮所著有省廬詩集司成吳梅邨序之行世

遊杏花邨有感呈喻武公郡伯

杏花邨外滿雲烟有客相携游覽前
演武樓臺橫白日依山栝栢映諸天
繁華半盡兵戈裏廬舍多消戰伐年
回憶題詩沽酒日風流端藉繼先賢

洪度汪

二黃蘭水人少尹所著有訥菴詩

杏花邨懷古

太守風流憶昔年兩行紅樹到雲邊
牧牛童指黃鰠酒把釣翁迴杜鵑船
古瓦千門鋪繡額斷碑數字篆苔錢
還思種杏人何處二月尊前獨惘然

吳非

杏花邨懷古

刺史行春記古邨誰開帘市復當門
壚皆敗冷經牛父徑盡傾肥讓竹孫
風景移時山着色湖光變態水生痕
牧童重理頻年話亂後猶看觸在原

吳綺

繭次江都人湖州太守

游湖山飲淨林菴樹下同諸子分韻

主人愛客爲抒愁挈榼聊爲近
卽游亂蜨臂香樵徑暖一雞啼竹
酒壚幽江光隱映山光見樹色參
差月色浮歸向西窗重續醉滿檐
涼影燭初收

宗巨源

次濤興化人

前題

平巖沙石夾城西山接湖隄水繞谿喜遇樵人尋舊徑偶
隨酒客過招提泉聲互聽鐘聲應松影交加竹影迷紅袖
碧紗都不計暫將名對遠公題

郎遂

前題

風塵何處足留觀步屨城西上小巒幽鳥送聲藏隔嶺輕
舟垂釣下前灘尊開別院看蓮白客座疎林映日丹果許

花邨仍策杖貧家葵菽也將歡

姜展

武昌石林農者居渚湖躬自耕種暇則放歌原隰高懷曠致有陳白雲之風惜少鍾林輩物色耳

擬游杏花邨

杏花邨落郡城西曾挂青帘近小隄浦水遙連流鏡靜江
烟斜綴過帆迷芳名不逐時人換秀句還存杜老題與客
何須傷往事携壺且醉夕陽低

馮鼎延

聖調烏程人少尹

杏花邨

出郭閒尋古杏邨漁舟春水到城根地經兵火花無跡碑

護烟雲字尚存
堃寺但餘新草樹
好山空憶舊王孫
祇今莫問前朝事
月落平湖夜有痕

朱之梅

素公清溪人

杏花邨

相傳杜牧刺池州
邨酒邨花兩共幽
人去却能稱地主
我來休更問田疇
邨中予昔有山莊今廢
荒烟近鎖孤城暗
古樹遙涵

堃寺秋千載芳踪
空記憶湖山遠眺
大江流

王青選

青公葛源人州丞

杏花邨懷古

鄣外丘園迥出奇，斷魂從此覓香卮。
浦光含練偏添色，山翠籠烟更著姿。
樹冷雲封亭寂寂，花零春散草離離。
游人不敢輕裁句，舊有名題是牧之。

李時

男蟄濬源人，研農先生子。

西郊覽勝歸途值雨，集澄觀堂分籠字。

春城如繡錦，雲籠步入幽。
溪画意同文，選亭荒遺史。
乘碑摹古字，嘆穹窿。
班荆人醉花，邨酒陌柳羣。
飄麥浪風好，雨也應知風。
約催詩隨到，艸堂中。

張茂

元子江寧人。

寄懷友人杏花邨

憶昔交歡笑語溫
題詩珍重款柴門
六年面別離情遠
一卷書成閉戶尊
我自空憐桃葉渡
君今合占杏花邨
未知編輯經多少
願坐春風得共論

孫之綽

梁樹青陽人

杏花邨酒家

癸亥春總河靳公試
池屬七學諸生題

出郭尋幽路欲疑
柳搖深處嘯黃鸝
山橋草店連花鴨
細雨春風颭酒旗
游紀杜翁曾有愛
事緣牧豎更留詩
平鋪芳徑年年在
烟景依稀是舊時

吳繼澄

景州東流入

杏花邨

刺史風流幸未遐
名園春雨一停車
枝頭香重頻欺酒
座上顏酡欲妬花
一片湖光招醉月
千重山色映明霞
杖頭錢盡貂還解
莫管江城動晚笳

吳映藜

校文建德人

寄友人重開杏花邨

見然青園州

曾知文杏映遙天
續整風流作世傳
十里香疑丹桂迥
一邨紅是彩雲鮮
湖光依舊連江濶
帘影從新帶雨懸
路上

不勞相借問酒家餘味勝當年

劉廷燾

告三試門人

清明游杏花邨兼訪友人舊宅

歲歲清明在客中今年重覽故鄉風
紙標歷亂山頭白杯酒歡呼人面紅
廢圃幾時纔種杏晴江又見度歸鴻
兒童浪信春光好爭曳輕裾避柳叢

故人仲蔚住邨西爲叩幽居過楚畦
門掩蓬蒿留犬吠籬編楊柳待鶯啼
可因佳節謀沽酒定愛春田學把犁
且語小童通姓字江天日落萬山低

朱翼垣

蒼雨崑山人

過池陽懷古題杏花邨舍

次漣溪韻

浮圖雄峙俯雙溪
疊嶂雲深九子迷
蘆荻渡旁漁網集
杏花邨外酒帘低
侍中片石江分楚
太守層臺山是齊
問訊此中詞賤客
嘯歌應在選樓西

鄭祖第

甲先蘭水人工詩画

杏花邨

石城西去景堪尋
刺史詩題說到今
株老春來猶幾簇
邨荒亂後已無林
墟香尚憶黃公酒
笛響還聞牧豎音
却羨

主人能好客名流滿坐快分吟

黃猷楨

宣臣菊江人

杏花邨

漫道滄桑負舊遊依然點綴續風流
板橋紅影分花徑
埭浦香烟過酒樓
孤興每從塵外得
高懷直欲醉中收
行來疑是桃源路何必桃源似此不

吳國鐸

振斯九華人

杏花邨卽事

繡錯香塍處處通
平湖如鑑浸遙空
逍遙漁艇來還去
眼

睨黃鶯西復東修竹盡依僧梵綠杏花都放酒家紅忽聞
牛背前岡遂恍接唐時舊牧童

張思齊

省堂號遜翁奉天人廬州郡丞

過池陽讀郎子趙客杏花邨志因訂泛湖之約

塵泥磬折幾消魂喜說茲來近杏邨杜守尋酣牧豎引黃
公知味井壚存繁花不及當風醉名勝先從好句論白浦
平湖無限意待將鼓枻覓根源

宗觀

崔問江都人

文選閣

維摩閣下客停車出郭風光画不如兩漢以來無選本六臣之後有傳書蕭梁代遠空啼鳥原廟神遊記食魚隔得

揚州烟樹外好春辜負到吾廬

廣陵亦有文選樓

按杏花邨西三里許有梁昭明廟俗所稱西廟也舊有閣貯文選板今閣圯移構秀山廟從僧請謗稱昭明冕服陵在焉居人考古者曰失古蹟矣

杜鵑

渡口經過臺館荒汀洲葦荻隱漁莊山崖有姓還呼杜人代多迷不記唐紫蠟黃魚邨裏市白沙翠竹屋邊桑樊川

觴詠遺踪在欲買茅茨作漫郎

元次山自號漫郎